

Bouônjour. Ch'est mé acouo eune fais, Brian Vibert, tch'a l'pliaîsi d'vos présenter la Lettre Jèrriaise chu Sanm'di lé dgiêx-neuf d'Avri.

Et bein, nos v'là à la fin des quarante jours du Carême, autrement nommé Tchithême. Nos v'là à la fin d'la s'maine la pus sainte historiquement et j'sommes sus l'pas d'porte pour célébrer eune aut' fais d'main la victouaithe d'la Résurrection d'not' Sauveu, Jêsû-Christ. J'espéthe qu'ous êtes tous prépathés et qu'ous avez fait l's arrangements nécessaithes pour vos célébrations.

La s'maine pâssée, Mêcrédi en êffet, j'tais auve un groupe d'amîns et j't'êmes à distchuter Pâques et plusieurs voulaient saver pouortchi qué j'associons des oeufs d'chocolat et des lapîns auve chute saison r'ligieuse. Ch'est eune tchestchion qué bein d's êfants d'mandent. Et bein, i' n'y'a autcheune réfêthence dans la Bibl'ye à oeu ou à lapîn concèrnant Vendrédi Saint ou la Résurrection dé Dînmanche et ch'est tout à fait eune ancienne invention tch'est dév'nue traditionnelle avau l's années.

Mais pouortchi l'oeu? Ch'est qué l'oeu peut èrprésenter la tombe dé not' Sauveu. Sa tombe fut scêllée auve eune ênorme pierre, un pèrron, et quand la tombe fut ouvèrte l' n'tait pus là. La tombe 'tait viède et Jêsû avait vaîntchu la mort et 'tait en vie. D'abord les oeufs d'chocolat n'avaient autchun cont'nu et quand nou-s-ouvrait l'oeu, i' 'tait viède et l'jaune d'oeu, lé noeud d' l'oeu avait dispathu produîthant eune nouvelle vie.

Malheutheusement l'oeu est dév'nu pus împortant qu' la tombe pour bein des gens et j'espéthe qué j'pouôrrons tous explyitchi à d'autres qué l'oeu viède n'est qu'un sîmbole dé la réalité d' la tombe d'sotchupée.

Et quant ès lapîns et lus rapport auve Pâques, ch'est lus connexion auve tout tchi r'prend vie dans l'Èrnouvé et la nouvelle vie qué Jêsû offre auve san pardon et la garantie dé vivre êternellement auve Li pour tous tch'ont fouai en Li.

All'-ous jouie d'main d'un oeu d'chocolat ou r'garder des lapîns à sauter et danser? All'-ous jouie dé fliottes et d'mèrvelles et dé tout l'bouon festîn d'Pâques? Dgieu nos bénit auve eune abondance dé sa bouonté et j'sommes èrconnaîssants et j'Li offrons not' gratitude. Mais d'main, qué not' priorité sait dé célébrer en adouothâtion not' Péthe Êternel et la victouaithe qué Jêsû-Christ a accompli pour nous.

Ayiz tous un jouaiyeux et glorieux Pâques et qué lé Sauveu, not' Seingneu Jêsû-Christ sait au centre dé nos célébrations.